

Nunatsinni umiartortungorniarnermi ilinniarfiusinnaasut suulluunniit tamarmik illoqarfimmut ataatsimut, ilinniarfimmullu ataatsimut ataatsimuulersinneqassagaluarpata pitsaaqutigisinnaasaanik pitsaanngequtigisinnaasaanillu aammalu aningaasatigut kingunerisinnasaanik misissueqqillugit Naalakkersuisut peqquneqarnissaannik Inatsisartut aalajangiiffigisassassaattut siunnersuut. Maskinmesterinnngorniartarnerup imarsiornernermik ilinniarfiup iluaniilernissaa soorluttaaq nunatsinni umiarsuup naalagaatut ilinniartitsisoqartalersinnaanera misissugassanut ilaassaaq. Misissuineq naammassereersimassaaq UKA25 sioqqullugu. (Inatsisartunut ilaasortaq Peter Olsen, Inuit Ataqtigiit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Peter Olsen-ip, Inuit Ataqtigiit, aalajangiiffigisassatut siunnersuuteqarneranut Naalakkersuisut aallarniutigalugu qujaffigissavaat.

Imarsiornermik ilinniarfiit sumiiffimmi ataatsimi ataatsimuulersinnaanerat Naalakkersuisut isumaqataaffigaat, taamaalillunilu nunatsinni imarsiornermik ilinniarfiusut ataqtigiinnerulerlutik sunniiveqatigiinnerulerlutillu ingerlaqtigiilerniassammata, naammassisartullu amerlisinneqarlutik, imarsiornikkut aalisarnikkullu ilinniarsimasunik pisariaqartitsineq naapertorlugu. Tamannalu anguniakkamut naapertuuppoq tassaasorlu pisariaqartitsineq naapertorlugu ilinniartitaanernik aaqqissuussineq Naalakkersuisut Ilinniartitsineranut periusissiaanni aammalu Attassiinnarnissamut ineriartortitsinissamullu pilersaarut 2- mi erseqqissarneqartoq.

Siunnersuut naapertorlugu Imarsiornermik Ilinniarfiit (Nuuk / Paamiut) ataatsimuulissappata, maskinmesteritullu ilinniartitaanerup Sisimiuniittup Imarsiornermik Ilinniarfimmut nuunneqassagaluarpat taamatullu umiarsuup naalagaatut ilinniartitaanerup pilersinneqarluni aallartinneqarnerani pitsaaqutaasinnaasut ajoqutaasinnaasullu aningaasatigullu kingunerisinnaasaat misissoqquneqarput – oqaatigineqartut tamarmik illoqarfimmi ataatsimi inissisimaffimmullu ataatsimut inissinneqarlutik.

Naalakkersuisut maluginiarpaat, siunnersuummi qulequtaasup iluamik erseqqissisinnngimmagu sumi ataatsimoortumik Imarsiornermik Ilinniarfissatut siunnersuutigineqartup inissinneqarnissaa. Taamaattorli Naalakkersuisut isumaqarput Imarsiornermik Ilinniarfiit ataatsimoortinnissaannut siunnersuutip imarsiortunik amerlanerusunik naammassisoqartalernissaannik periarfissiillunilu kinguneqartitsisarumaartoq.

Siunnersuuteqartup siunnersuummini Savalimmiuni periuserineqartup assigisaatut maskinmesterinnngorniarneq imarsiornermik ilinniarfiup ataanut inissinneqarsinnaanera kissaatigalugu erseqqissaavoq.

Naalackersuisut Imarsiortutut ilinniartitaanerit pillugit suliniuteqarnerminni pingaarnertut toqqammavigaat, Imarsiornermik Ilinniarfiup ullumikkumut tulluurtumik nutaaliaanerusumillu timitaqalernissaa, ilinniartitaanernut ineriartortitsineq ullumikkumullu tulluarsaaneq nunami maani isumannaarniarlugit.

Naalackersuisut imarsiornikkut ilinniartitaanerit iluini politikikkut pingaarutilittut kissaatigaat, imarsiornikkut suliffeqarfinni ilinniarsimasunik sulisoqarnikkut pisariaqartinneqartut nunaqavissuunissaat. Tassunga tunngatillugu immikkut isiginiarneqartariaqarput - aningaasanut inatsimmi 2024-mi naalackersuinikkut anguniagaasut - aalisakkerinerup iluani ineriartortitsinissamut tunngatillugu ilinniarsimassutsikkut piginnaasat, taamatullu qulakkeerneqassasoq nunaqavissunik amerlanerusunik aqumioqalernissaa. Kalaallit aalisariutaanni inuttalersuisarneq pillugu Namminersorlutik Oqartussat nalunaarutaanni taannarpiaq anguniakkatut siunnerfiuvoq.

Imarsiornermik ilinniarfiup pitsaanerusumik siunissamullu tulluarsagaanerusumik timitaqalernissaa imarsiornikkullu ilinniartitaanerit nutarterneqarnissaat Naalackersuisuniit kissaatigineqarpoq.

Taamaammat Naalackersuisut suleqatigiissitamik pilersitsinissaq maanna sulissutigaat, imarsiornikkut ilinniartitaanernik pisariaqartitanik ullumikkumullu tulluarnerusunik nunanullu allanut imarsiornikkut aalisarnikkullu inuussutissarsiuteqartunut ilinniartitaanernik unammillersinnaassuseqartunik sulissuteqartussamik. Suleqatigiissitap suliassanut tunngavissap suliarineqarnera allartereerpoq suleqatigiissitamillu pilersitsinissaq piaartumik pissaaq.

Naalackersuisut Savalimmiunut Norge-mullu Imarsiornermik Ilinniarfiup pitsaanerusumik tulluarsagaanerusumillu timitaqalernissaa imarsiornikkullu ilinniartitaanerit nutarterneqarnissaat pillugit isumassarsiorlutik angalanissamik pilersaaruteqarput.

Maannakkut Marstal Navigationsskole suleqatigalugu internet-ikkut umiarsuarni naalagangorniartoqartarpoq. Siunertaavoq suleqatigiinnermi misilittakkat tunngavigalugit umiarsuarni naalagangorniarnermik ilinniartitaaneq nunatsinni aallartissasoq. Taamaammat umiarsuarni naalagangorniarnermik ilinniartitaanerup nunatsinnut eqqunniarneqarnera Naalackersuisuniit aallartinneqareerpoq.

Umiarsuarni naalagangorniartunut ilinniartitaaneq nutaaq pilersaarut ilinniarfiup nutaamik timitalernissanut pilersaarusiornermi ilanngullugu inissinneqarumaarpoq.

Oqariartuutigineqartut taakkartukkakka § 37-inut akissuteqaatini - nr. 44/2024 aammalu nr. 149/2024 - eqqartorneqartareerput.

Soorunami imarsiornikkut ilinniartitaanerit nutarterneqarnerini Imarsiornermillu Ilinniarfiup nutaamik timitalerneqarniarneranut suliassat ataqatigiissillugit suliarineqartariaqartut.

Taamaammat ataqatiginneq qulakkeerniarlugu Naalakkersuisut siullertut qulakkeerusuppaat, imarsiornikkut ilinniartitaanernik nutarterinermi suna iluseq tunngavigalugu nutarterisoqaaqqaartariaqarnersoq.

Taamaammat Naalakkersuisut qulequtaasumut allannguutissatut siunnersuutigaat:

“Imarsiornikkut ilinniartitaanernik siunissami pisariaqartinneqartunik aaqqissuussinermik, tamannalu tunngavigalugu ilinniarfiup timitalerneqarnissaanik, Naalakkersuisut soqutigisaqaqatigiillu peqatigalugit suliaqarnissamik Inatsisartut aalajangiiffigisassaattut siunnersuut”